



Anwar menerima al-Quran daripada Dr Ali (kanan) sambil diperhatikan Habib Umar (kiri) pada majlis Muzakarah Ulama-Umara sempena Festival Turath Islami Selangor di Shah Alam, semalam. (Foto Hazreen Mohamad/BH)

Ulama perlu tegur kerajaan dengan baik bukan mencerca

Nasihat secara berhemah, ikhlas angkat martabat negara, umat Islam

mohd_iskandar@bh.com.my

Shah Alam: Ulama harus berani menegur kerajaan demi mengangkat martabat negara dan umat Islam di negara ini, kata Datuk Seri Anwar Ibrahim.

Perdana Menteri menegaskan, kerajaan dan pemimpin sedia mendengar teguran ulama selagi ia dibuat dengan baik dan bukan untuk mencerca, memfitnah atau menghukum.

“Ini tiada perbezaan pendapat, ulama boleh tegur dengan baik, menghormati dan mendampingi supaya dapat diperbaiki dan itu ditekankan oleh ulama, bukan untuk mencerca, memfitnah dan menghukum.

“Untuk pemimpin pula, apabila dengar ulama bercakap dengan ikhlas dan berani menegur ia (perlu) diterima dengan baik dan menjawab dengan baik,” katanya ketika ditemui selepas menghadiri Muzakarah Ulama-Umara sempena Festival Turath Islami Selangor, di sini, semalam.

Muzakarah itu dihadiri bekas Mufti Agung Mesir, Prof Dr Ali Jum’ah dan pengasas Darul Musthafa dari Yaman, Habib Umar Hafidz.

Anwar berkata, beliau yakin kaedah menegur kerajaan yang disarankan kedua-dua ulama berkenaan mampu meletakkan negara di landasan yang baik, sekali gus mengangkat martabat umat sejajar cita-cita kerajaan Madani.

Namun, beliau berkata, dalam sesetengah hal yang mungkin dipersetujui bersama, ia tidak dapat dilaksanakan kerajaan disebabkan keterbatasan yang ada, selain tahap kefahaman umat dalam sesuatu perkara.

“Jadi, kadang-kadang apa yang kita bicarakan itu ditafsirkan berbeza dan bukan kerana satu uslub (kaedah) dan ittijahat (aliran) dalam politik ini,” katanya.

Pada masa sama, Perdana Menteri juga meminta Kementerian Pendidikan dan Jabatan Kemajuan Islam Malaysia untuk menerbitkan semula *Koleksi Hadis 40 Imam Nawawi* untuk diedar kepada semua sekolah bagi memberi perkembangan ilmu kepada murid dan pelajar.

“Kalau baca hadis sahaja mungkin anak kita tidak semuanya dapat menghadam dengan baik dan kita boleh tanya pandangan Dr Ali nanti, apa yang dicadangkan untuk diterbit dan diedar di seluruh negara,” katanya.

“Ini sekurang-kurangnya adalah sebagai hasil sambutan daripada pandangan Dr Ali dan Habib Umar tadi,” katanya.

Menyentuh isu kalimah Allah, Anwar menegaskan ia tidak seharusnya dibincang secara terbuka sehingga menimbulkan kekeliruan dalam kalangan umat Islam.

Beliau sekali lagi menegaskan tindakan kerajaan menarik balik semula rayuan terhadap penggunaan kalimah Allah dibuat selepas perkara itu dirujuk kepada pandangan mufti serta titah Raja-Raja Melayu.

Katanya, hal berkenaan sudah beberapa kali dijelaskan termasuk ketika di Parlimen mengenai penggunaan kalimah Allah yang dikhaskan kepada umat Islam di Semenanjung.

“Maksudnya, umat Islam di Semenanjung sahaja boleh gunakan kalimah Allah untuk mengelakkan kekeliruan dan masalah dakyah agama lain, maka agama lain tidak diizinkan.

“Kemudian untuk Sabah dan Sarawak, ada sedikit kelonggaran dengan syarat yang ketat supaya tidak timbul kekeliruan.

“(Kalimah Allah) boleh dibahas, tetapi dalam majlis tertutup, (perbahasan mengenainya) tidak patut mengelirukan umat.

“Tetapi, kita (kerajaan) masih dituduh menggadaikan dan mengkhianati amanah rakyat,” katanya.